



REPÚBLICA DEMOCRÁTICA DE TIMOR-LESTE IV GOVERNUN KONSTITUSIONÁL

KOMUNIKADU IMPRENSA

Díli, 28 Outubru 2009

Deklarasaun

Husi

*Portavóz IV Governu Konstitusionál,
Sekretáriu Estadu Konseihu Ministrus*

Pakote Referendum atu dezenvolve ka harí fali áreas rurais

Lori IV Governu Konstitusionál nia naran, Primeiru-Ministru Timór-Leste, Sua Exelênsia Xanana Gusmão, apresenta ona planu ba Parlamentu Nasionál kona-ba “**Pakote Referendum**” ne’ebé hanesan estratéjia nasional ida atu aselera dezenvolvimentu rural no hakbiit liután setór privadu ho projetus infra-estruturas kiik no natón balu hamutuk 700.

Governu Gusmão nian revela ka fó sai nia planu kona-ba osan US\$70 milhoens hodi harí no/ka hadi’a, entre buat seluk, estradas, pontes, sanitasaun, eskolas, hadi’a facilidades kuidadu saúde nian no abastesimentu bee i tau matan mós ba nesesidades especiais hanesan infra-estruturas atu halo kontrolu ba xeias ka bee no mota sa’e boot, liuhusi projetus oiain iha distritus sanulu resin-tolu iha Timór-Leste tomak laran.

Planu ne’e úniku tebes tamba hala’o hodi dudu ba oin setór privadu nasional nian hotu; iniciativa espezial ida hodi fó sai kbiit ba empregárius lokais iha distritus no sub-distritus.

Ho dalan injekta ka hatama diretamente fundus ka osan ba comunidades liuhusi projetus infra-estruturas, Governu hein katak bele estimula ekonomias lokais, hahú kria direta ka indiretamente servisu ba ema, identifika no mobiliza kapasidade bázika lokal, no loke tán oportunidades ba comunidades atu bele partisipa iha prosesu harí nasaun.

Hanesan parte husi Governu nia reformas ba descentralizasaun, kontratus husi pakote referendum sei descentraliza ho assistênsia ka tulun husi Asosiasaun Empreziál ba Konstrusaun no Obras Públikas (AECCOP). Ho alkanse nasional ida atu organiza konstrusaun/dezenvolvimentu empregárius iha distritus no sub-distritus; sei responsabiliza ba prosesu kontratu ne’ebé transparente no justu kona-ba distribuisaun hamutuk ho “Grupo Trabalho” Governu nian ida ne’ebé sei halo fiskalizasaun ba prosesu entrega ka fó kontratus, asegura implementasaun ida ke transparente no responsável no garante katak bele kumpri leis aprovizionamentu Timór-Leste nian.

Agio Pereira, Sekretáriu Konseihu Ministrus no Portavóz ofisial IV Governu Konstitusionál hateten “ Pakote Referendum tuir duni objetivus Estadu no Programa Governu nian. Lokaliza investimentu públiku no hakbiit setór privadu ne’ebé foin hahú moris iha áreas rurais ne’e aspetu ida ke importante tebes ba pakote referendum. Pakote referendum ne’e hola parte ida iha Estratéjia global ba Dezenvolvimentu Nasionál, fo tulun mos hodi harí hikas fali ita nia Nasaun no comunidades hotu ho projetus ne’ebé sira planu ona, i halo mos comunidade sira

sente katak buat ne'e sira nian duni no iha orgulhu boot tamba komunidadas rasik bele kontribui atu hadi'a sira nia moris no ambiente ne'ebé sira hela bá." **FIN**

Ba informasaun seluktán bele kontakta: Agio Pereira +670 723 0011; E-mail: agiopereira@cdm.gov.tl